



Fuffzäände Joorgang Fasnacht 2012

Die Gsalzene

Am Minschterblatz said im Theaater vo de Marionette
Dr Kaschperli zem Grethli: «Unsri Biini isch no z'rette
S' Ensemble wird vrgreesseret – das frait mi seer mi Schatz
Als neie Holzkopf schafft ab morn bi uns dr Moritz vo dr BaZ!»

Dr Ueli Maurer hett dr Kampfjet «Grippen» bi de Schwede bstellt
Drbyy bringt Waar vo dert nur Äärger – jede Baschtler hätts vrzellt
Mit aim Imbusschlüssel muesch di zeerscht durch 100 Schachtle quääle
Und zletscht duet denn no garantiert die wichtigscht Schruube fääle!

Im Fumoir vo de Sioux im Indianerreservat
Said dr Haptling «Fetter Eich» zem Haptling «Kleiner Kopfsalat»:
«Die Sach mit dane Fumoir schyynt mr gspässig als Idee
Bi dämm Durenand vo Rauchsignal kasch s'aigne Wort nimm gsee!»

Dr Nobälbrüys fyr dr Friide hänn drei Fraue abgarniert
Und mir hoffe, das Joor wärde unsri Schätzli nominiert
So blange mir jetzt jede Daag, es wurd fir si entscheide
Wil wenn die Drei noch Oslo raise hämmer ändlig mol dr Friide!

Unsri Noochbere die butzt sit mäenge Joor im Grosse Root
Die heert so vyyl, dass si uns allewyyf e Vaers vorschloot
Sit neischtem lääne mir das ab und si duet nur no butze
Im Banggberyych ischs halt riskant, Insiderwisse z'nutze
Das isch dr «ewig Wichtigputz» – das isch die «liebi Blauderdäsche»
Und dää do mit em Helge nenne mir ganz aifach «grossi Fläsche»
Mir sinn iibergwichtig, limitiert und wänn uns nid aastränge
Als Bresidant in Nordkorea duet das allewyyf no länge!

Mir Gsalzene haenn langsam gnueg vom Laebe in de Baize
Manager im Sportberyych – dä Job dä duet uns raize
E Glanzidee die hämmer scho und bringe s'Gschäft zem laufe
Mir sueche e Tschetschen, dää sott dr FC Ziiri kaufe

... und dr Monschervärs

Wie duet sich s'EU-Läbe loone?
Statt schaffe holt me Subventioone
Bürokratie isch d'Religion
Mit 45 in Pension!

Bim schaffe zwai Stund uff de Bai
Scho kemme d'Grieche doodmied hai
Doch trotz Erschepfig machts kai Mie
No bitzli Styre z'hinterzie

Und im Olymp dert ganz wyt obe
Regiert dr Euro vo de Schwobe
Vo Athen bis Saloniki
Gitts nur no Suurgrut statt Tsatsiki

Fyr andri isch das e Lapalie
«Dolce far niente» in Italie
Die sinn – das derf me konstatiere
Sogar z'fuul zem demonstriere

Doch s'Angi maint zem Berlusconi:
«Muesch nid maine Eich verschoon i
Statt «Bunga Bunga» wie ne Ferkel
Haissts jetzt kuschle mit dr Merkel!»

Unsri Mainig luutet so:
D'EU isch kurz vor em K.O.!
Sogar derart degeneriert
Dass d'Türkei s'Byyddrittgsuech sistiert

So duet uf d' Zuekunft vo de Lette
Gar kai Buechmacher me wette
Nid besser goots de Zypröte
1:1000 isch dert d' Quote

Vrgässe kasch au d'Portugiese
Die sueche ständig nach Devise
Und die bättelende Rumääne
Wämmer gar nit erscht erwääne

«Take it easy» maint dr Schott
«Wär nid zaalt goot nid banggrott
Viel besser suecht me sich e Spänder
Bekiffit gnueg wäre d'Niederländer!»

De Slowake und Bulgaare
Miest me Gäld leene zem spaare
Und das nämt me vo de Pole
Die hänn drum bi de Tscheche gstole

D'Tscheche geen zue de Sloweene
Die dien sichs vo de Finne leene
Am Schluss sinn d'Luxeburger ryych
Das haisst «EU-Finanzzuglych»

Die Situation kennt eskaliere
Wie sotti d'Schwyz druff reagiere?
S' gitt nur ai Wäg us däre Not
Die Gsalzene in Bundesrot!

www.diegsalzene.ch

Wotsch d Fasnacht mol vo inne gsee – kumm doch zue dr BSG!
www.bsg-online.ch